

四庫全書

史部

欽定四庫全書

史部
漢制攷卷一至四

詳校官編修臣范來宗

編修臣程嘉謨覆勅

總校官原任中允臣王燕緒

校對官中書臣朱烜

謄錄監生臣趙廷麒

欽定四庫全書

史部十三

漢制攷

政書類一

通制之屬

提要

臣等謹案漢制攷四卷宋王應麟撰應麟字伯厚晚年自號深寧叟其先浚儀人南渡後遂家於鄞縣淳祐元年進士寶祐四年又中博學宏詞科度宗時官至禮部尚書是編因兩漢書諸志於當時制度多詳於大端畧於

細目因撫采漢儒經註及說文諸書所載鈎稽排纂以補其遺頗足以資考證又以唐時賈孔諸疏去古已遠方言土俗時異名殊所謂某物如今某物某事如今某事者徃徃循文箋釋於舊文不必悉符如周禮疏不知步繇假紵及五夜儀禮疏不知偃領之類不一而足應麟皆為一一訂辨旁引證明又周禮太史職注云太史抱式疏謂占文謂之式應

麟則別引藝文志羨門式法以解之考式者
候時之儀器史記日者傳旋式正基漢書王
莽傳天文郎按式於前日時加某皆指此器
所引亦較舊義為長非但抄撮舊文無所別
擇其中偶失考定者如周禮士師職注云三
公出城郡督郵盜賊道蓋漢時郡掾分部屬
縣為督郵其分治各曹者亦名督郵故朱博
傳云為督郵書掾此督郵盜賊蓋掾主捕盜

賊者其不加掾字猶巴郡太守張納碑陰書
督盜賊掾李街耳以此職又主為三公導行
故云督郵盜賊導蓋道與導古字通也賈公
彥疏乃謂使舊為盜賊之人督察郵行往來
於義為誤應麟沿用其說未免干慮之一失
要其大致稽核具有依據較南宋末年侈空
談而鮮寔徵者其分量相去遠矣乾隆四十
三年六月恭校上

總纂官臣紀昀臣陸錫熊臣孫士毅

總校官臣陸費墀

漢制攷自序

漢制載於史者先儒攷之詳矣其見他書者未之攷也
嘗謂法始乎伏羲而成乎堯三代損益至周大備夫子
從周與從先進之言所謂百世可知者其法著于春秋
東遷之初先王典章槩有存者義和桓鬯之賚王命猶
重也司徒緇衣之美王官猶賢也祭仲論京不度過制
之城猶未衆也無駭卒始請族世官之敝猶未遠也秦
山有禘則巡守之蹟猶可復也九宗五正有後則封建

之制猶可尋也師服之言建國臧僖伯之諫觀魚則據
經守古之士猶多也春秋何為而作乎宰咺歸贈天衷
民彝大泯亂春秋所以始歟於獻六羽於稅畝皆曰初
於丘甲於三軍皆曰作於南門於雉門及兩觀皆曰新
作夫子蓋傷之也秦作西時臚於郊祀魯惠公請郊禘
史角實往而祀禮始僭矣其後齊作內政而兵制變晉
作爰田而田制變晉作執秩而官制變鄭鑄刑書而刑
制變大夫奏肆夏季氏旅泰山晉不知穀烝魯不知尚

羔禮幾亡矣然名卿大夫講聞故實三代文獻藹如也
納鼎有諫觀社有諫申繻名子之對里革斷罟之規御
孫別男女之贄管仲辭上卿之饗柳下季之述祀典單
襄公之述夏令秩官魏絳之述夏訓虞箴郊子能言紀
官州鳩能言七律子革倚相能誦祈招懿戒觀射父之
陳祭祀閔馬父之稱商頌格言猷訓粲然可睹齊虞人
之守官魯宗人之守禮慄慄秋霜夏日之嚴劉子所云
天地之中子產所云天地之經胥臣敬德之聚晏子禮

之善物又皆識其大者統紀相承淵源相續得夏時坤
乾見易象魯春秋而知三代之禮所以扶持於未墜者
豈一人之力哉戰國去籍之餘孟子言井地曰大畧言
班爵祿曰聞其畧言諸侯喪禮曰未學而嘗聞若其宏
綱丕式因畧而致詳推舊而為新聖人復起不能易也
春秋大復古譏變古井牧變而阡陌畿服變而郡縣車
乘變而步騎什一變而箕斂佩玉變而帶劔簋席變而
杯案生民之理有窮則聖王之法可改古其不可復乎

是意唯太史公知之於夏殷紀舉孔子正夏時善殷輅
卓然見損益之要指於高帝紀曰朝以十月車服黃屋
左纛蓋歎其襲秦也漢之止於為漢自高帝之襲秦始
雖然兩漢之制文中子奚取焉吁三代遠矣漢詔令人
主自親其文猶近於書之典誥也郎衛執戟之用儒生
猶近於王宮之士庶子也司徒府有百官朝會殿以決
大事猶近於外朝之詢衆也牧守有子孫郡國有辟舉
庶幾建侯之舊丞相進見御坐為起在輿為下庶幾敬

臣之意三老掌教化孝悌力田置常員鄉遂之流風遺
韻亦間見焉是之取爾君子尚論古之人以為漢去古
未遠諸儒佔畢訓故之學雖未盡識三代舊典而以漢
制證遺經猶幸有傳注在也冕服車旗彝器之類多以
叔孫通禮器制度為據其所臆度無以名之則謂若今
素物及唐儒為疏義又謂去漢久遠雖漢法亦不可攷
蓋自西晉板蕩之後見聞放失習俗流敗漢世之名物
稱謂知者鮮焉况帝王制作之法象意義乎此漢制之

僅存於傳注者不可忽不之攷也愚少嘗有聞老弗敢
墜因紬次為編以俟後之君子自流遡源三代之禮庶
乎其可識矣辛巳夏五王應麟序

欽定四庫全書

漢制攷卷一

宋 王應麟 撰

禮

徒注此民給徭役者若今衛士矣 疏衛士亦給徭
役故舉漢法況之

項禹傳諸離宮及長樂宮衛可減大半寬繇役

膳夫注今時美物曰珍膳

浦人注奄今謂之宦人 古者從坐男女没入縣官為

奴其少才知以為奚今之侍史官婢或曰奚官女
疏侍史官婢舉漢法言之或曰官女者漢時有此別
號案左氏晉惠公之女名妾稱為官女謂宦事秦公
子亦云宦女也

貢禹傳諸官奴婢十萬餘人

大府注大府為王治藏之長若今司農矣 疏漢時司
農主府藏故史游章云司農少府國之淵

司會注司會主天下之大計計官之長若今尚書 疏

漢之尚書亦主大計故舉以況之也

成帝紀建始四年罷中書宦官初置尚書員五人

職內注職內主入也若今之泉所入謂之少內 疏漢

之少內亦主泉所入案王氏漢官解云小官嗇夫各
擅其職謂倉庫少內嗇夫之屬各自擅其條理所職
主由此言之少內藏聚似今之少府但官卑職碎以
少為名

丙吉傳少內嗇夫白吉曰食皇孫亡詔令注云少

內掖庭主府藏之官也

大宰八法注鄭司農云官屬謂六官其屬各六十若今

博士大史大宰大祝大樂屬大常也 疏漢始叔孫

通為奉常後改為大常

八則注祿若今月奉也 疏古者祿皆月別給之漢之

月奉亦月給之

九職注鄭司農云間民謂無事業者轉移為人執事若

今傭賃也

九賦注賦口率出泉也今之算泉民或謂之賦此其舊
名與 疏漢法民年二十五已上至六十出口賦錢
人百二十以為算

食貨志董仲舒曰田租口賦二十倍於古 貢禹
傳古民亡賦算口錢起武帝征伐四夷重賦於民
民產子三歲則出口錢故民重困宜令兒七歲去
蓋乃出口錢年二十乃算元帝令民產子七歲乃
出口錢 鹽鐵論曰雖三十而以頃畝出稅加之

以口賦更繇之役 理道要訣漢高帝每歲人常
賦百二十錢至孝文時省儉減至四十武帝事邊
費廣人產子三歲則出口錢孝宣減人算三十孝
成減四十光武有產子復以三年之算

關市山澤謂占會百物幣餘占賣國中之斤幣皆未作
當增賦者若今賈人倍算矣

小宰注宮刑在王宮中者之刑建明布告之糾猶割也
察也若今御史中丞 疏應劭云秩千石朝會獨坐

副貳御史大夫內掌蘭臺圖籍外督刺史糾察百寮
故舉漢法況之

八成注鄭司農云質劑謂市中平價今時月平是也
病

傳別質劑皆今之券書也

歲終則令羣吏致事注使齋歲盡文書來至若今上計
疏漢之朝集使謂之上計吏謂上一年計會文書
及功狀也

憲禁于王宮注憲謂表縣之若今新有法令云

宰夫八職注治要若歲計也治凡若月計也治目若今

日計也

贊治若今起文書草也 疏起文書草乃後判決是為

贊治之法

治敘次序官中如今侍曹伍伯傳吏朝也 疏漢時五

人為伍伯長也是五人之長言傳吏朝者傳在朝羣

吏諸官事務於朝也胥於什長亦然故舉漢法況之

也

書其能者與其良者注鄭司農云若今時舉孝廉賢良
方正茂才異等 疏孝廉者謂孝弟廉絜賢良即經
中良者謂有賢行而良善也云方正者人雖無別行
而有方幅正直者也云茂才者漢光武諱秀時號為
茂才即經云能者也云異等者四科不同等級各異
故云異等

宮正次舍注次諸吏直宿若今部署諸廬者舍其所居

寺

史記秦紀衛令曰周廬設卒甚謹西京賦曰徼道
外周千廬內傅胡廣曰衛士於周垣下為區廬

幾其出入注鄭司農云若今時宮中有罪禁止不得出
亦不得入及無引籍不得入宮司馬殿門也 疏今
時謂漢法言引籍者有門籍及引人乃得出入也又
云司馬殿門者漢宮殿門每門皆使司馬一人守門
比千石皆號司馬殿門也

元帝紀令從官給事宮司馬中者得為大父母父
母兄弟通籍應劭曰籍者為二尺竹牒設其年紀
名字物色縣之宮門案省相應乃得入也顏師古
曰司馬門者宮之外門也衛尉有八屯衛候司馬
主衛士徵巡宿衛每面各二司馬故謂宮之外門
為司馬門竇嬰傳太后除嬰門籍不得朝請王嘉
傳為郎坐戶殿門失闌免梁孝王傳梁之侍中郎
謁者著引籍出入天子殿門與漢宦官亡異

凡邦之事蹕注鄭司農云國有事王當出則宮正主禁
絕行者若今時衛士填街蹕也 疏漢儀大駕行幸
使衛士填塞街巷以止行人備非常也

宮伯凡在版者注鄭司農云版名籍也以版為之今時
鄉戶籍謂之戶版

以時頒其衣裘注衣裘若今賦冬夏衣 疏夏時班衣
冬時班裘賦班也皆賜授之義

庖人共祭祀之好羞注謂四時所為膳食若荊州之鮓

魚青州之蟹胥雖非常物進之孝也 疏鄭見當時

有之

集韻蟹醢
醢四夜切

外饗饗士庶子注士庶子衛王宮者若今時之饗衛士
矣

王尊傳正月行幸曲臺臨饗罷衛士如淳曰諸衛
士更盡得代去故天子自臨而饗之和熹鄧后紀
舊事歲終當饗遣衛士注蓋寬饒傳歲盡交代上
臨饗罷衛卒是也

亨人注爨今之竈 疏周禮儀禮皆言爨論語王孫賈

云寧媚於竈祭法天子七祀之中亦言竈自孔子已

後皆言竈

腊人乾肉注大物解肆乾之謂之乾肉若今涼州烏翅
矣

瘍醫五毒注今醫方有五毒之藥

酒正五齊注泛者成而滓浮泛泛然如今宜成醪矣醴
猶體也成而汁滓相將如今恬酒矣盎猶翁也成而

翁翁然葱白色如今鄴白矣

鄴在何反

緹者成而紅赤如

今下酒矣沈者成而滓沈如今造清矣 疏宜成說

以為地名故曹植酒賦曰宜成醴醪蒼梧縹清若馬

融所云今之宜成會稽稻米清似宜成以為酒名故

劉杳要雅亦以宜成為酒名二者未知孰是恬酒於

五齊中為恬故以恬酒况之鄴白漢時蕭何所封地

名鄴

釋文即今之白醪酒宜作醪作鄴假借也

也下酒謂曹床下酒其色

紅赤故以緹名之案鄭下注五伯緹衣亦赤黑色也

造清漢時造清熟則滓沈故以况沈齊也

三酒注事酒酌有事者之酒其酒則今之醪酒也昔酒
今之酋久白酒所謂舊醪者也清酒今中山冬釀接
夏而成 疏事酒冬釀春成以漢之醪酒况之昔為
久酋亦遠久之義故以漢之酋久白酒况之但昔酒
對事酒為清若對清酒則為白故云酋久白酒也晉
語云味厚寔昔毒酒久則毒也昔酒為久冬釀接春
清酒久於昔酒自然接夏也中山郡名故魏都賦云

醇酎中山沈酒千日

四飲注漿今之載漿也酏今之粥

載昨再反

疏載之言載

米汁相載漢時名為載漿內則有黍酏酏飲粥稀者之清也

大祭三貳中祭再貳小祭壹貳注益之者以飲諸臣若今常滿尊也 疏言益之故常滿故以漢法况之

漿人六飲注涼今寒粥若糗飯雜水也 疏案內則飲

內有濫無涼彼鄭云以周禮六飲較之則濫涼也紀

莒之間名諸為濫言諸者非一之義內則名涼為濫
參驗相當

凌人治鑑注鑑如甌大口以盛水置食物于中以禦溫
氣 疏漢時名為甌即今之甕是也

夷槃注漢禮器制度大槃廣八尺長丈二尺深三尺漆
赤中 疏叔孫通前漢時作漢禮器制度多得古之
周制故鄭君依而用之也周謂之夷槃漢謂之大槃

是別代異名

喪大記注漢禮大盤廣八尺長
丈二深三尺赤中夷槃小焉

籩人注籩竹器如豆者其容實皆四升 疏依漢禮器
制度而知也

朝事之籩注鮑者於糗室中糗乾之出於江淮鱸者析
乾之出東海 疏鄭以目驗知之言糗室者謂糗土
為室

今河間以北煮種麥賣之名曰逢燕人膾魚方寸切其
腴以啗所貴 疏引漢法證麩亦是熬煮之麥引時
事證膾亦是腹腴以擬祭與啗貴者同也

饋食之籩注饋食薦孰也今吉禮存者特牲少牢諸侯
之大夫士祭禮也 疏天子諸侯祭祀之禮亡

醢人饋食之豆豚拍注鄭大夫杜子春云今河間名豚
脅聲如鍛縛

鹽人飴鹽注鹽之恬者今戎鹽有焉 疏即石鹽是也
幕人注帝王在幕若幄中坐上承塵

掌次皇邸注鄭司農云皇羽覆上邸後版也玄謂後版
屏風與染羽象鳳皇羽色以為之 疏言後版者謂

為大方版於坐後畫為斧文言屏風者據漢法況之
無正文故言與以疑之

外府掌邦布之入出注布泉也布讀如宣布之布其藏
曰泉其行曰布取名於水泉其流行無不徧泉始蓋
一品周景王鑄大泉而有二品後數變易不復識本
制至漢唯有五銖久行王莽改貨而異作泉布多至
十品今存於民間多者有貨布大泉貨泉貨布長二
寸五分廣寸首長八分有奇廣八分其圜好徑二分

半足枝長八分其右文曰貨左文曰布重二十五銖
直貨泉二十五大泉徑一寸二分重十二銖文曰大
泉直十五貨泉徑一寸重五銖右文曰貨左曰泉直
一也 疏漢書食貨志周景王時患泉輕將更鑄大
泉單穆公曰不可王不聽鑄大泉文曰寶貨漢興為
秦泉重難用更令民鑄榆莢錢至孝文有司言榆莢
三銖輕易姦詐請鑄五銖至王莽居攝變漢制更造
大泉徑寸二分重一十二銖文曰大泉直五十又造

契刀形如刀直五百又造錯刀以黃金錯其文曰一
刀直五千與五銖錢凡四品並行至莽即真罷五銖
錢異作泉布多至十品其布有大布次布弟布壯布
中布差布厚布幼布么布小布是為貨十品也其泉
十品者莽居攝作大泉錯刀契刀即真作小錢么錢
幼錢布錢壯錢天鳳年更造貨布與貨錢為十品莽
以劉有金刀罷契刀錯刀從莽至漢末鄭君時見行
此三者故云今存於民間也彼文貨布無有奇廣八

分半足支長八分等十一字此鄭君目所覲見以義
增之耳彼大泉直五十言十五者亦誤當從五十為
正也王莽之大泉蓋與景王所鑄大泉亦異也

愚按武帝

鑄五銖疏謂孝文作五銖誤也

周語景王二十一年鑄大錢韋昭注錢者金幣之名所以買賣物通財用也古曰泉後轉曰錢單穆公云古者有母平子子權母而行然則二品之來古而然矣鄭君云錢始一品至景王有二品省之

不熟耳前後漢紀武帝元狩五年行五銖錢

王莽時廢

先武建武十六年始行五銖錢齊孔覲曰自漢鑄五銖至宋文帝歷五百餘年不變者輕重可法得
貨之宜也

幣齋注鄭司農云齋或為資今禮家定齋作資

司會書契版圖注書謂簿書契其最凡也版戶籍也圖
土地形象田地廣狹 疏漢時以簿書記事至於餘
物記事亦謂之簿書故舉漢法而言也漢之戶籍皆

以版書之故以漢法况

職內凡受財者受其貳令而書之注受財受於職內以給公用者貳令者謂若今御史所寫下本奏王所可者書之若言某月某日某甲詔書出某物若干給某

官某事

下戶
嫁反

疏御史掌贊書用財者先奏白於王

王許可則御史贊王為辭下職內是其貳令職內則書之為本案然後給物與之

職幣以書揭之注鄭司農云揭之若今時為書以著其

幣

著直
畧反

掌皮會其財齋注齋所給予人以物曰齋今時詔書或曰齋
計吏 疏漢時攷使謂之計吏有詔賜與之則曰齋
引之證齋是與人物也

內宰教六宮注六宮若今稱皇后為中宮矣 疏漢舊
儀有此事也

哀帝紀中宮注皇后之宮

禁其竒衰注竒衰若今媚道 疏漢法有官禁云敢行

媚道者謂道妖衰巫術以自衒媚故舉漢法證經

內小臣陰事注陰事羣妃御見之事若今掖庭令晝漏不盡八刻白錄所記推當御見者

闈人掌守王宮之中門之禁注中門為外內為中若今宮闕門

女祝招梗禴禳注四禮唯禳其遺象今存疏漢時招梗及禴不行唯禳一禮漢日猶存其遺象

典婦功物書而揭之注鄭司農云書其賈數而著其物

若今時題署物

內司服禕衣揄狄闕狄注今世有圭衣者蓋三翟之遺俗 疏漢時有圭衣刻為圭形綴於衣是由周禮有三翟別刻繒綴於衣漢俗尚有故云三翟遺俗也

素沙注素沙者今之白縛也

縛音絹今作絹字

六服皆袍制以

白縛為裏使之張顯今世有沙縠者名出于此 疏素沙為裏無文故舉漢法而言謂漢以白縛為裏以周時素沙為裏耳

縫人棺飾注漢禮器制度飾棺天子龍火黼黻皆五列
又有龍翼二其戴皆加璧 疏明天子加數與喪大
記不同之義

翼柳注書曰分命和仲度西曰柳穀

度音宅

疏濟南伏

生書傳文度亦居也柳者諸色所聚日將沒其赤無
有餘色故云柳穀

吳虞翻奏鄭玄解尚書違失古大篆卯字讀當為
卯古柳卯同字而以為昧

追師副編注副之言覆所以覆首為之飾其遺象若今
步繇矣服之以從王祭祀編編列髮為之其遺象若
今假紒矣服之以桑也 疏漢之步繇謂在首之時
行步繇動此據時目驗以曉古至今去漢久遠亦無
以知之矣假紒亦是鄭之目驗以曉古至今亦不知
其狀也

續漢輿服志皇后入廟步搖以黃金為山題貫白
珠桂枝相紉八爵九華熊虎赤羆天祿辟邪南山

豐大特六獸東觀漢記章帝詔東平王蒼以光烈
皇后假髻帛巾各一衣一篋遺王

屨人注複下曰烏禪下曰屨古人言屨以通於複今世
言屨以通於禪俗易語反與 疏漢時名複下者為
屨并通得下禪之屨

夏采建綏注今禮家定作蕤 疏謂今說禮之家蕤賓
在午月一陰爻生陰氣委蕤於下故旌旗之綏亦定
作蕤也

媒氏注媒之言謀也謀合異姓使和成者今齊人名麩

麩

魚列反曰媒

漢書注孟康曰媒酒教顏師古曰齊人名麩餅曰
媒

司門注司門若今城門校尉主王城十二門 疏都司
總監十二門官故舉漢法況之

園人注園今之苑 疏此據漢法以況古古謂之園漢
家謂之苑

大司徒建邦之土地之圖注土地之圖若今司空郡國
輿地圖 疏案漢蕭何收秦圖籍以知天下阨塞廣
遠至後漢乃有司空郡國地圖輿者車輿其前牙曲
地形不可正方故云輿地圖也案職方亦云掌天下
之圖注直云如今司空輿地圖不云郡國者彼以司
馬主九畿并夷狄而言故不得云郡國此經云主人
民之數則唯據九州之內故此注云郡國也

武帝元狩六年御史大夫奏輿地圖請所立國名

立齊燕廣陵三王淮南王安與左吳等按輿地圖
部署兵所從入疏謂後漢乃有益攷之未詳也光
武披輿地圖指示鄧禹建武十五年封皇子大司
空上輿地圖馬援曰前披輿地圖見天下郡國百
有六所肅宗建初中案輿地圖令諸國戶口皆等

租入

史記正義天為蓋地
為輿故云輿地圖

阜物注鄭司農云阜物柞栗之屬今世間謂柞實為阜
斗

日至之景注鄭司農云土圭之長尺有五寸以夏至之日立八尺之表其景適與土圭等謂之地中今潁川陽城地為然 疏潁川郡陽城縣是周公度景之處古跡猶存

王朴曰古者植圭於陽城以其近洛也蓋尚歎其中乃在洛之東偏開元十二年遣使天下候影南距林邑北距橫野中得浚儀之岳臺應南北弦居地之中司馬公曰日行黃道每歲有差地中當隨而

轉移故周在洛邑漢在潁川陽城唐在汴州浚儀
其食者半參之一四之一注土均均邦國地貢輕重之
等其率之也公之地以一易侯伯之地以再易子男
之地以三易必足其國禮俗喪紀祭祀之用乃貢其
餘若今度支經用餘為司農穀矣 疏據漢法以況
之

保息六注寬疾若今瘞不可事不算卒可事者半之也
疏漢時瘞病不可給事不算計以為士卒若今廢

疾者也可事者謂不為重役輕處使之取其半功而已似今殘疾者也

正治而致事注致事上其計簿 疏漢時攷吏謂之計吏據其使人也此言計簿據其文書也

宣帝黃龍元年謂上計簿具文而已御史察計簿疑非實者按之匡衡傳郡定國界上計簿更定圖言丞相府貢禹傳郡國擇便巧史書習於計簿能欺上府者以為右職

小司徒以歲時入其數注若今四時言事 疏漢承周
後皆四時入其數今時白役簿皆在於冬代異時殊
故有革別也

大比注鄭司農云五家為比故以比為名今時八月案
比是也要謂其簿 疏漢時八月案比而造籍書周
以三年大比未知定用何月故以漢法八月況之

後漢皇后紀漢法常因八月算人漢儀注曰八月
初為算賦

鄉師前後之屯注鄭大夫讀屯為課殿 疏當時俗有

課殿之語故讀從之

鄉大夫其舍者國中貴者賢者能者服公事者老者疾者皆舍注鄭司農云征之者給公上事也舍者謂有復除舍不收役事也貴者謂若今宗室及關內侯皆復也服公事者謂若今吏有復除也老者謂若今八十九十復羨卒也疾者謂若今癘不可事者復之疏四事皆若今者並舉漢法況之

鹽鐵論今寬力役之政二十三始賦五十六而免
所以輔者壯而息老艾也

興賢者能者注鄭司農云興賢者謂若今舉孝廉興能
者謂若今舉茂才 疏孝悌廉絜人之德行故以孝
廉況賢者茂才則秀才也才人之技藝故以況能者
也

黨正以歲時粒較比注鄭司農云如今小案比 疏此
舉漢法言小案比對三年大比為小耳

族師春秋祭酺注酺者為人物裁害之神也較人職又有冬祭馬步則未知此世所云蠶螟之酺與人鬼之步與蓋亦為壇位如雩禋云 疏酺不知何神故舉漢法以況之但漢時有蠶螟之酺神又有人鬼之步神故兩言之

封人注畿上有封若今時界矣 疏漢時界上有封樹故舉以言之

急就篇頃町界畝畦埒封

置其絳注鄭司農云絳著牛鼻繩所以牽牛者今時謂之雉與古者名同 疏自漢以前皆謂之絳案少儀

云牛則執紉紉則絳之別名

福衡注福設於角衡設於鼻如椴狀也 疏漢時有置

于犬之上謂之椴加音故舉以况衡

鼓人以金鐃和鼓注鐃鐃于也圜如碓頭大上小下樂作鳴之與鼓相和 疏鐃于之名出于漢之大予樂官其形並出彼文而知之也

以金鑄節鼓注鑄鈺也形如小鍾軍行鳴之以為鼓節
疏形如小鍾者亦據漢法而言也

以金鑄止鼓注鑄如鈴無舌有秉執而鳴之以止擊鼓
疏鑄如鈴無舌者亦約漢法而知也

以金鑄通鼓注鑄大鈴也 疏亦約漢法知之
牛人共其牛牲之互注互若今屠家縣肉格

克人展牲注鄭司農云展具也具牲若今時選牲也玄
謂展牲若今夕牲也 疏夕牲此舉漢法以況之

丙吉子顯從祠高廟至夕牲日乃使出取齋衣顏
師古注未祭一日其夕展視牲具謂之夕牲

載師以廛里任國中之地注廛里者若今云邑里居矣
疏異義公羊十一稅遠近無差漢制收租田有上
中下與周禮同義

閭師疏劉琰問夫家之征與夫布其異如何鄭答云夫
家之征者田稅如今租矣夫布者如今算斂在九賦
中者也

遺人十里有廬三十里有宿注廬若今野候徒有房也
宿可止宿若今亭有室矣 疏此舉漢法以況義漢
時野路候迎賓客之處皆有房舍與廬相似漢法十
里有亭有三老人皆有宮室故引以為況也

保氏九數注鄭司農云九數方田粟米差分少廣商功
均輸方程羸不足旁要今有重差夕桀
的夕音句股也

疏方田已下皆依九章算術而言今有重差夕桀
句股此漢法增之馬氏注以為今有重差夕桀夕桀

亦是算術之名與鄭異案今九章以句股替旁要則
旁要句股之類也 少儀正義云九數之名書本多
誤儒者所解方田一粟米二差分三少廣四商功五
均輸六方程七贏不足八旁要九云今有重差句股
者鄭司農指漢時云今世於九數之內有重差句股
二篇其重差即與舊數差分一也去舊數旁要而以
句股替之為漢之九數即今之九章也馬融干寶等
更云今有夕桀各為二篇未知所出

鄭玄傳通九章算術注周公所作也凡九篇方田
粟米差分少廣均輸方程傍要盈不足句股馬績
傳善九章算術注劉徽九章算術方田一粟米二
差分三少廣四商功五均輸六盈不足七方程八
句股九並無重差夕桀劉徽九章算經序伏羲氏
始畫八卦作九九之術以合六爻之變記稱隸首
作數周公制禮而有九數九數之流則九章是矣
漢北平侯張蒼大司農中丞耿壽昌皆以善算名

世蒼等因舊文之遺殘闕稱刪補故較其目則與

古或異而所論者多闕語也凡望極高測絕深而

無知其遠者必用重差句股則必以重差為率故

曰重差也一方田以御田疇界域二粟米以御交

質變易三褒分差也以御貴賤稟稅四少廣以御積

累方圓五商功以御功程積實六均輸以御遠近

勞費七盈不足以御隱雜互見八方程以御錯糅

正負九句股以御高深廣遠梅福傳齊桓之時有

以九九見者唐藝文志劉向九章重差一卷

調人凡有鬪怒者成之注鄭司農云成之謂和之也和之猶今二千石以令解仇怨後復相報移徙之此其類也

媒氏嫁殤注鄭司農云今時娶會是也

司市以次叙分地注次謂吏所治舍思次介次也若今市亭然疏舉漢法而言

張平子西京賦廓開九市通關帶闔旗亭三重俯

察百隧周制大胥令也惟尉注漢宮闕疏曰長安立九市其六市在道西三市在道東史記褚先生曰臣為郎與方士會旗亭下

質劑注質劑謂兩書一札而別之也若今下手書言保物要還矣疏漢時下手書即今畫指券與古質劑同也

思次介次注思次若今市亭也介次市亭之屬別小者也

量度者注若今處斗斛及丈尺也

以璽節出入之注璽節印章如今斗簡封矣 疏案漢法斗簡封其形方上有封簡其內有書則周時印章上書其物識事而已

左傳正義周時印已名璽但上下通用

泉府以國服為之息注以其於國服事之稅為息也王莽時民貸以治產業者但計贏所得受息無過歲什一 疏此與周少異周時不計其贏所得多少據本

徵利王莽時雖計本多少為定及其徵科唯據所贏多少假令萬泉歲還贏萬泉徵一千贏五千徵五百餘皆據利徵什一也

司關以節傳出之注傳如今移過所文書 疏傳則過所文書

文帝十二年除關無用傳張晏注傳信也若今過所也釋名曰過所至關津以示之或曰傳

掌節使節皆金也注今漢有銅虎符 疏證周時節用

銅之意

門關用符節注符節者如今宮中諸官詔符也璽節者今之印章也旌節今使者所擁節是也將送者執此節以送行者皆以道里日時課如今郵行有程矣以防容姦擅有所通也 疏符節已下周法無文故皆約漢法況之案太史公本紀漢文帝二年九月初與郡國守相為銅虎符竹使符應劭曰銅虎符第一至第五國家當發兵遣使者至郡國合符符合乃聽受

之竹使符者皆以竹箭五枚長五寸鐫刻篆書第一至第五張宴曰符以代古之圭璋從簡易也鄭引之者欲明漢時銅虎符本出於此也

後漢杜詩上疏舊制發兵以虎符其餘徵調竹使而已

遂人夫一廛注鄭司農云揚子雲有田一廛謂百畝之居也玄謂廛城邑之居王莽時城郭中宅不樹者謂不毛出三夫之布 疏引莽時事者證廛是城郭中

里宰以歲時合耦于耜注耜者里宰治處也若今街彈之室於此合耦使相佐助因放而為名 疏鄭以漢法況之漢時在街置室簡彈一里之民於此合耦使相助佐因放而名耜也

金石錄漢都鄉正街彈碑在汝州界故昆陽城中其歲月畧可見蓋中平二年正月而其額題都鄉正街彈碑莫知其為何碑也水經魯陽縣有南陽都鄉正衛為碑平氏縣有南陽都鄉正衛彈勸碑

隸釋亦以為衛彈碑蓋未攷此注也酸棗令劉熊
碑云愍念烝民勞苦不均為作正彈造設門更

合人耦則牛耦亦可知也 疏周時未有牛耦耕至漢
時搜粟都尉趙過始教民牛耕今鄭云合牛耦可知
者或周末兼有牛耦至漢趙過乃絕人耦專用牛耦
故鄭兼云焉

山海經后稷之孫叔均始作牛耕周益公曰竊疑
耕犁起於春秋之間故孔子有犁牛之言而弟子

丹耕亦字伯牛月令季冬出土牛示農耕早晚賈
誼新書劉向新序俱載鄒穆公曰百姓飽牛而耕
暴背而耘大率在秦漢之際何待趙過過特教人
耦犁共二牛費省而功倍爾

旅師平頌其興積注縣官徵聚物曰興今云軍興是也
疏鄭舉漢法況之興皆是聚積之義也

草人土化之法注化之使美若汜勝之術也 疏漢時
農書有數家汜勝為上故月令注亦引汜勝

藝文志農家汜勝之十八篇

音凡

稻人芟夷之注鄭司農說今時謂禾下麥為夷下麥言芟刈其禾於下種麥也

迹人邦田之地政注田之地若今苑也

掌蜃共白盛之蜃注盛猶成也謂飾牆使白之蜃也今東萊用蛤謂之又灰云 疏蜃蛤在泥水之中東萊人又取以為灰故以蛤灰為又灰

園人牧百獸注備養衆物也今掖庭有鳥獸自熊虎乳

雀至於狐狸鳧鶴備焉

司稼出斂法注斂法者豐年從正凶荒則損若十傷
二三實除減半 疏舉法以況義謂漢時十分之內
傷二分三分餘有七分八分者實際減半者謂就七
分八分中為實在仍減去半不稅於半內稅之以凶
荒所優饒民法也

槁人外內朝冗食注外朝司寇斷獄弊訟之朝也今司
徒府中有百官朝會之殿云天子與丞相參決大事

馬是外朝之存者與內朝路門外之朝也冗食者謂留治文書若今尚書之屬諸直上者 疏引漢法說之謂以次當直留在朝宿不復須以食供之冗散也外內朝上直諸吏謂之冗吏亦曰散吏

續漢歷志熹平四年馮光陳晁言歷元不正詔以羣臣會司徒府議注蔡邕集載三月九日百官會府公殿下東面校尉南面侍中郎將大夫千石六百石重行北面議郎博士西面戶曹令史當坐中

而讀詔書公議蔡邕前坐侍中西北近公卿與光
晃相難問是非焉 後百官志注蔡質漢儀曰司
徒府與蒼龍闕對厭於尊者不敢號府應劭曰丞
相舊位在長安時府有四出東西門耳國每有大
議天子車駕親幸其殿殿西王侯以下更衣併存
每歲州郡聽採長吏臧否民所疾苦還條奏之是
謂舉謠言舉謠言者掾屬令史都會殿上主者大
言某州郡行狀周禮外朝干寶注曰禮司徒府中

有百官朝會殿 朝士注今司徒府有天子以下
大會殿亦古之外朝

漢制攷卷一

欽定四庫全書

漢制攷卷二

宋 王應麟 撰

春官注鄭師農云唐虞歷三代以宗官典國之禮與其
祭祀漢之大常是也 疏代異法殊禮有沿革故至
漢時祭祀之禮使大常主之

典瑞注瑞節信也典瑞若今符璽郎 疏舉漢法而況之
守祧奄八人注奄如今之宦者 疏漢以奄人為內宦
則名奄人為宦

世婦每宮卿二人中士八人注世婦后宮官也王后六
宮漢始大長秋詹事中少府大僕亦用士八人 疏
見周時用奄之義

鞮屨氏注鞮屨四夷舞者所屣也今時倡蹋鼓盻行者
自有屣 疏謂漢時倡優作樂蹋地之人并擊鼓盻盻作
聲者行自有屣屨證四夷舞者亦自有屣與中國不
同也

太宗伯鬻辜注故書鬻為罷鄭司農云罷辜披磔牲以

祭若今時磔狗祭以止風 疏舉漢法以況義狗屬
西方金金制東方木之風故用狗止風也

五命賜則注則地未成國之名王莽時以二十五成為
則方五十里合今俗說子男之地獨劉子駿等識古
有此制焉 疏時有孟子張包周及何休等並不信
周禮有五百里已下之國以王制百里七十里五十
里等為周法故鄭指此等人為俗說也

孤執皮帛注帛如今璧色繒也 疏漢時有璧色繒故

鄭舉而言之未知色之所定也

小宗伯立軍社注社之主蓋用石為之 疏案許慎云

今山陽谷祠有石主

甫窳注今南陽名穿地為窳

肆儀為位注謂若今時肆司徒府也

肆師治其禮儀注故書儀為義鄭司農義讀為儀古者

書儀但為義今時所謂義為誼

司尊彝皆有舟注鄭司農云舟尊下臺若今時承槃

疏漢時酒尊下槃象周時尊下有舟故舉以為況也
獻酌脩酌注獻讀為摩莎之莎齊語聲之誤也脩讀為
滌濯之滌今齊人命浩酒曰滌

司几筵黼依注斧謂之黼其繡白黑采絳帛為質依其
制如屏風然 疏屏風之名出於漢世鄭以今曉古
故舉屏風為況也

繅席次席注繅席削蒲弱展之編以五采若今合歡矣
次席桃枝席有次列成文 疏漢有合歡席故舉漢

法況之漢世以桃枝竹為席次第行列成文章

紛純注紛如綬有文而狹者 疏漢世綬是薄帔有文

章而狹

典瑞裸圭有瓚注漢禮瓚槃大五升口徑八寸下有槃

口徑一尺 疏此漢器制度文叔孫通所作

珍圭注杜子春云珍當為鎮以徵召守國諸侯若今時

徵郡守以竹使符也玄謂珍圭王使之瑞節如今時

使者持節矣 疏持節即子春所云竹使符也

高帝紀注節以毛為之上下相重取象竹節將命

者持之以為信

武帝紀征和元年更節加黃旄

光武紀注節所以

為信以竹為之柄長八尺以旄牛尾為其眊三重
馮衍與田邑書今以一節之任建三軍之威豈特
寵其八尺之竹犇牛之尾哉

牙璋注鄭司農云以牙璋發兵若今時以銅虎符發兵
疏銅虎竹使符漢時皇帝使者之瑞節

漢齊王傳魏勃給召平曰王欲發兵非有漢虎符

驗也吳王傳弓高侯責膠西王曰未有詔虎符擅
發兵擊義國嚴助傳上曰新即位不欲出虎符發
兵郡國迺遣助以節發兵會稽會稽守欲距法不
為發

司服韋弁服注韋弁以韎韋為弁又以為衣裳今時伍
伯緹衣古兵服之遺色 疏鄭韎為赤色韋猶以為
疑故舉漢事以為況言伍伯者伍行也伯長也謂宿
衛者之行長見服纁赤之衣是古兵服赤色遺象至

漢時是其兵服赤之驗也

奠衣服注今坐上魂衣也 疏守祧云遺衣服藏焉至

祭祀之時則出而陳於坐上

冢人丘封之度注王公曰丘諸臣曰封漢律曰列侯墳
高四丈闕內侯以下至庶人各有差 疏周禮丘封
高下樹木之數無文以漢法況之也

職喪注國之喪禮喪服士喪既夕士虞今存者其餘則
亡 疏儀禮三千條漢興惟得十七篇高堂生所傳

即今儀禮是也

大司樂成均注董仲舒云成均五帝之學 疏董仲舒

作春秋繁露繁多露潤為春秋作義潤益處多

弛縣注弛釋下之若今休兵鼓之為 疏樂縣在於虞

釋下之與兵鼓縣之於車上休亦釋下之義相似故

舉今以況古

樂師帔舞注帔析五采繒今靈星舞子持之是也

皇舞注皇雜五采羽如鳳皇色持以舞 疏漢世鳳皇

數出五色

行以肆夏趨以采薺注鄭司農云人君行步以肆夏為節趨疾於步則以采薺為節若今時行禮於太學罷出以鼓陔為節

大胥掌學士之版以待致諸子注鄭司農云版籍也今時鄉戶籍世謂之戶版卿大夫之諸子則案此籍以召之漢大樂律曰卑者之子不得舞宗廟之酌除吏二千石到六百石及關內侯到五大夫子先取適子

高七尺已上年十二到年三十顏色和順身體脩治者以為舞人與古用卿大夫子同義 疏漢法卑者之子不得舞宗廟之酎則元士之子不入故知卿大夫之諸子也月令四月云天子與羣臣飲酎鄭注云酎之言醇謂重釀之酒春酒至此始成作此酎亦謂重釀之酒祭宗廟而用之祭未有相飲之法漢紀注云漢承秦爵二十等五大夫九爵闕內侯十九爵列侯二十爵宗廟舞人用貴人子弟與周同故引以為

證十二誤當云二十至三十卿大夫國中自七尺以
及六十案韓詩二十從役與國中七尺同是七尺
為二十矣不
得為十二也

小師簫管注簫編小竹管如今賣飴餠所吹者管如篴
而小併兩而吹之今大予樂官有焉

鼗注如鼓而小持其柄搖之旁耳還自擊 疏後鄭解
鼗依漢法而知

鐘師祓夏注杜子春云祓讀為陔鼓之陔 疏漢有陔

鼓之法

樂師注鼓
陔見上

笙師遂管春牘應雅注鄭司農云春牘以竹大五六寸
長七尺短者一二尺其端有兩空髹畫以兩手築地
應長六尺五寸其中有椎雅狀如漆篳而弁口大二
圍長五尺六寸以羊韋鞞之有兩紐疏畫杜子春讀
遂為蕩滌之滌今時所吹五空竹遂 疏此皆約漢
法知之

旄人教舞散樂注散樂野人為樂之善者若今黃門倡
矣 疏不在官之員內謂之為散漢倡優之人亦非

官樂之內故舉以為說也

漢禮樂志成帝時鄭聲尤甚黃門名倡丙彊景武
之屬富顯於世藝文志黃門倡車忠等歌詩十五
篇

占夢注以日月星辰占夢者其術則今八會其遺象也
用占夢則七 疏按堪輿大會有八小會亦有八
大祝六曰說注董仲舒救日食祝曰焘焘大明灑滅無
光奈何以陰侵陽卑侵尊是之謂說也

九祭注鄭司農云衍祭羨之道中如今祭殤無所王命
九擻注杜子春云竒讀為竒偶之竒謂先屈一膝今雅
拜是也或云竒讀曰倚倚拜謂持節持戟拜身倚之
以拜鄭司農云褒拜今時持節拜是也肅拜但俯下
手今時擻於至反即
今之揖是也 疏儀禮鄉飲酒賓客有
擻入門之法推手曰揖引手曰擻

左傳郤至敢肅使者注肅手至地若今擻

字林云
舉首下

也手漢何武舉方正所舉者召見槃辟雅拜有司以

為詭衆虛偽

小祝置銘注鄭司農云銘書死者名於旌今謂之柩 疏

漢時謂銘為柩

設道齋之奠注杜子春云齋當為粢道中祭也漢儀每
街路輒祭 疏引漢法為證後鄭不從者按既夕禮
祖廟之庭禮道中無祭法

甸祝禘牲注今侏大字也 疏今漢時人傍侏是侏大
之字

卷二
司巫掌巫降之禮注巫下神之禮今世或死既斂就巫
下禳其遺禮 疏郊特牲鄉人禳鄭注云禳彊鬼彼
逐疫癘之事此禳當家之鬼非彊鬼也

女巫注歲時祓除如今三月上巳如水上之類釁浴謂
以香薰草藥沐浴 疏一月有三巳據上旬之巳而
為祓除之事見今三月三日水上戒浴是也

大史正歲年以序事注中數曰歲朔數曰年中朔大小
不齊正之以閏若今時作曆日矣

抱天時注鄭司農云大史主抱式以知天時處吉凶
疏據當時占文謂之式以其見時候有法式故謂載
天文者為式

藝文志有羨門式法

馮相氏十有二歲注歲謂大歲歲星與日同次之月斗
所建之辰樂說說歲星與日常應大歲月建以見然
則今歷大歲非此也 疏以今歷大歲歲星北辰大
歲無跳辰之義非此經大歲者也

會天位注合此歲日月辰星宿五者以為時事之候若

今歷日大歲在某月某日某甲朔日直

音某也

保章氏星土注堪輿雖有郡國所入度非古數也今其

存可言者十二次之分也星紀吳越也玄枵齊也娵

訾衛也降婁魯也大梁趙也實沈晉也鶉首秦也鶉

火周也鶉尾楚也壽星鄭也大火宋也析木燕也此

分野之妖祥主用客星彗孛之氣為象 疏古黃帝

時堪輿亡後代有作堪輿者非古數雖非古數時有

可言者

占夢注天地之會建厭所處之日辰疏堪輿天老
曰假令正月陽建於寅陰建在戌張逸問厭對之
義答曰案堪輿黃帝問天老事云四月陽建於巳
破於亥陰建於未破於癸是為陽破陰陰破陽故
四月有癸亥為陰陽交會十月丁巳為陰陽交會
甄文志堪輿金匱十四卷注許慎云堪天道輿
地道也

十有二歲注歲星為陽右行於天大歲為陰左行於地
十二歲而小周其妖祥之占甘氏歲星經其遺象也
五雲之物注鄭司農云以二至二分觀雲色青為蟲白
為喪赤為兵荒黑為水黃為豐 疏蓋據陰陽書
內史凡四方之事書內史讀之注若今尚書入省事
疏漢法奏事讀之故舉以況之也

霍光傳尚書令讀奏

以方出之注杜子春云方直謂今時牘也 疏古時名

為方漢時名為牘故舉以說之

外史達書名注古曰名今曰字使四方知書之文字得能讀之 疏聘禮記云百名以上書之於策不滿百名書之於方古者之文字少直曰名後代文字多則曰字字者滋也滋益而多故更稱曰字

御史掌贊書注贊為辭若今尚書作詔文 疏謂若今出詔勅之書

續漢百官志尚書侍郎三十六人一曹有六人主

作文書起草安帝時陳忠上疏薦周興曰諸郎多
文俗吏鮮有雅材每為詔文宣示內外轉相求請
或以不能而專已自由辭多鄙固乃拜興尚書郎
巾車注纓今馬鞅

容蓋注鄭司農云容謂幬車山東謂之裳幬或曰潼容
玄謂蓋如今小車蓋也 疏此舉漢法小車有益以
況周

翟車有握注有握則此無蓋矣如今駟車是也 疏漢

法駟車無蓋故舉以況之

蒲蔽注鄭司農云謂羸蘭車以蒲為蔽天子喪服之車漢儀亦然 疏漢時有羸長蘭乘不善之車故舉以說之也

藩蔽注藩今時小車藩漆席以為之

良車散車注不在等者謂若今輜車後戶之屬作之有功有沽 疏漢時輜車與古者從軍所載輜重財貨之車皆車後開戶故舉以說之

典路注漢朝上計律陳屬車於庭 疏漢朝集使上計

律法謂上計會之法

安帝紀永初四年春正月元日會徹樂不陳克庭
車注每大朝會必陳乘輿法物車輦於庭以年饑
故不陳

司常九旗之物名各有屬注屬謂徽識也大傳謂之徽
號令城門僕射所被及亭長者絳衣皆其舊象 疏
引今漢法欲見古有此物遺及漢時也

司燿注燿讀如予若觀火之觀今燕俗名湯熱為觀則
燿火謂熱火與

司甲注甲今之鎧也 疏今古用物不同其名亦異古
用皮謂之甲今用金謂之鎧從金為字也

司戈盾注戈今時句子戟 疏漢時見戈有旁出者為

句子亦名胡子故號戈為胡子戟也

句古
侯字

大司馬師帥執提注鄭司農云提謂馬上鼓有曲木提
持鼓立馬髦上者故謂之提 疏據當時已有單騎

舉以況周其實周時皆乘車無輕騎法也

曲禮前有車騎則載飛鴻正義古人不騎馬經典
無言騎者今言騎者當是周末時禮左傳正義六
國之時始有單騎左師展將以公乘馬而歸此騎
馬之漸也

誓民注誓以犯田法之罰也誓曰無干車無自後射
疏此據漢田律而言

左右和之門注軍門曰和今謂之壘門立兩旌以為之

疏漢時軍壘為門名曰壘門與古和門同故舉為說
司勳祭於大烝注今漢祭功臣於廟庭 疏引漢法欲
見古者祭功臣在廟庭也

漢舊儀宗廟祭功臣四十人食堂下惟御僕滕公
祭於廟門外塾

加田注鄭司農云祿田亦有給公家之賦貢若今時侯
國有司農少府錢穀矣 疏漢法穀入司農錢入少
府故舉以為況

掌固設其飾器注兵甲之屬今城郭門之器亦然 疏
漢時城郭門守器所飾亦若今城郭門傍所執矛戟
皆有幡飾之等

挈壺氏分以日夜注異晝夜漏也漏之箭晝夜共百刻
冬夏之間有長短焉大史立成法有四十八箭 疏
馬氏云漏凡百刻春秋分晝夜各五十刻冬至晝則
四十刻夜則六十刻夏至晝六十刻夜四十刻鄭注
堯典云日中者日見之漏與不見者齊日長者日見

之漏五十五刻於四時最長也夜中者日不見之漏
與見者齊日短者日見之漏四十五刻於四時最短
此與馬義異以其馬云春秋分晝夜五十刻據日見
之漏若兼日未見日沒後五刻晝五十五刻夜四十
五刻若夏至晝六十刻通日未見日沒後五刻則晝
六十五刻夜三十五刻一年通閏有三百六十五日
四分日之一四時之間九日有餘較一刻為率云大
史立成法有四十八箭者此據漢法而言則以器盛

四十八箭箭各百刻以壺盛水懸於箭上節而下之
水水淹一刻則為一刻四十八箭者蓋取倍二十四
氣也 書正義漢初率九日增減一刻和帝時霍融
始請改之鄭注書緯考靈曜仍云九日增減猶未覺
誤也

續漢歷志永元十四年詔曰今官漏以計率分昏
明九日增減一刻違失其實大史待詔霍融上言
不與天相應令下晷景漏刻四十八箭立成式官

府當用者計吏到班予四十八箭

射人射牲注今立秋有羆劉云 疏漢時苑中有羆劉

即爾雅羆似狸劉殺也云立秋羆殺物

武帝紀膾五日注如淳曰漢儀注立秋羆膾蘇林

曰膾祭名羆虎屬常以立秋日祭獸王者亦以此

日出獵還以祭宗廟故有羆膾之祭顏師古曰續

漢書作羆劉膾劉義通 法言膾臘注膾八月旦

也今河東俗奉以為大節祭祀先人也

羅氏注今俗放火張羅其遺教 疏漢之俗間在上放
火於下張羅承之以取禽獸是周禮之遺教

羅春鳥注若今南郡黃雀之屬

方相氏注冒熊皮者以驚毆疫厲之鬼如今魃頭也

毆方良注天子之椁柏黃腸為裏而表以石焉 疏引

漢法為證

霍光傳注如淳曰漢儀注天子陵中明中高丈二
尺四寸周二丈內梓宮次椁椁柏黃腸題湊蘇林

曰柏木黃心故曰黃腸

大僕大寢之門外注大寢路寢也其門外則內朝之中
如今宮殿端門下矣

達窮者與遽令注鄭司農云窮謂窮寃失職則來擊此
鼓以達於王若今時上變事擊鼓矣遽傳也若今時
驛馬軍書當急聞者亦擊此鼓

前驅注前驅如今道引也

小臣燕出入則前驅注燕出入若今游於諸觀苑 疏

引漢法證之

隸僕掌蹕宮門之事注鄭司農云蹕謂止行者清道若

今時做蹕

弁師延紐注延冕之覆在上是以名焉紐小鼻在武上

笄所貫也今時冠卷當簪者廣衰以冠繼其舊象與

疏古之紐武笄貫交處若今漢時冠卷當簪所貫

者於上下之廣及隨繼之衰以冠繼者貫簪之處當

冠繼之中央是周冕垂紐於武貫笄之舊象以無正

文故云與以疑之凡冕體周禮無文叔孫通作漢禮
器制度取法於周今還取彼以釋之案彼文凡冕以
版廣八寸長尺六寸以上玄下朱覆之乃以五綵繅
繩貫五采玉垂於延前後謂之邃延

繅存注鄭司農云繅當為藻繅古字也藻今字也同物
同音

會五采注鄭司農云沛國人謂反紒為膾玄謂會讀如
大會之會 疏漢歷有大會小會取會聚之意

玉璣注璣讀如薄借綦之綦綦結也 疏漢時有薄借
綦之語故讀從之亦取結義薄借之語未聞

司戈盾設藩盾注藩盾盾可以藩衛者如今之扶蘇與
疏舉漢法以況之

司弓矢枉矢注枉矢者取名變星飛行有光今之飛矛
是也 疏案援神契云枉矢射慝考異郵曰枉矢精
狀如流星蛇行有尾見天文志曰狀大流星是其妖
變之星行時有光漢時名此矢為飛矛故舉以為說

也

廋人注鄭司農云散讀為中散大夫之散

圉師注杜子春讀椹為齊人言鐵椹之椹

職方氏天下之圖注天下之圖如今司空輿地圖也

疏大司徒掌九州不言夷狄九州之內有邦國故以
郡國言之此職方兼主夷狄夷狄中漢時不置郡國
惟置校尉掌之故此注亦不言郡國也

司圉注鄭司農云圉土謂獄城也今獄城圉 疏東方

主規規主仁恩凡斷獄以仁恩求出之故園也

司隸注隸給勞辱之役者漢始置司隸亦使將徒治道
溝渠之役後稍尊之使主官府及近郡 疏以漢時
司隸官與周同故舉以為況也

萍氏注今天問萍號作蘋 疏離騷有天問篇天不可
問故以天問為名

冥氏注鄭司農云冥讀為冥氏春秋之冥 疏冥氏作
春秋書名若晏子呂氏春秋之類取其音讀也

漢儒林傳堂谿惠授泰山冥都都與筦路又事顏
安樂故顏氏復有筦冥之學冥氏春秋即冥都也
疏恐誤

雜氏注鄭司農云今俗間謂麥下為夷下言芟夷其麥
以其下種禾豆也

蠲氏注蠲今御所食蛙也

霍山曰丞相檀減宗廟羔菟龜

伊耆氏注今姓有伊耆氏也

大司寇兩劑注劑今券書也

欲有復於上注復猶報也報之者若上書詣公府言事
矣

以邦成弊之鄭司農云邦成謂若今時決事比也 疏
若今律其有斷事皆依舊事斷之其無條取比類以
決之故云決事比也

晉志漢時決事集為令甲以下三百餘篇

小司寇讀書則用法注鄭司農云如今時讀鞫已乃論

之 疏鞫謂劾囚之要辭讀已乃論其罪也

八辟注鄭司農云議親若今時宗室有罪先請是也議
賢若今時廉吏有罪先請是也議貴若今時吏墨綬
有罪先請是也 疏漢法丞相中二千石金印紫綬
御史大夫二千石銀印青綬縣令六百石銅印墨綬
前王而辟注鄭司農云小司寇為王道辟除姦人也若
今時執金吾下至今尉奉引矣 疏漢時執金吾及
令尉為帝奉引猶如小司寇為王導故引以為況

卷二
士師五禁注古之禁書亡矣今宮門有符籍官府有無
故擅入城門有離載下帷野有田律軍有囂謹夜行
之禁其猶可言者 疏舉漢法以況之在車離耦載
而下帷恐是姦非故禁之

三曰禁注禁則軍禮曰無干車無自後射比其類也

追胥注胥讀如宿僭之僭僭謂司搏盜賊也 疏時有
夜宿逐賊謂之僭

士之八成注鄭司農云八成者行事有八篇若今時決

事比 疏凡言成者皆舊有成事品式後人依而行
之決事依前比類決之

邦洵注鄭司農云斟酌盜取國家密事若今時刺探尚
書事 疏漢時尚書掌機密有刺探尚書密事斟酌
私知故舉為況也

詔司寇注若今日聽正法解也

傅別注故書別為辯鄭司農云傅或為符辯讀為風別
之別若今時市買為券書以別之各得其一訟則案

券以正之

鄉士辯其獄訟異其死刑之罪而要之注要之為其罪
法之要辭如今劾矣 疏劾實也

左傳疏漢世名斷獄為劾

士師受中協日注鄭司農云協和合支幹善日若今時
望後利日也士師受中若今二千石受其獄也 疏
漢時受二千石祿稟郡守之等受在下已成之獄利
日即合刑殺之日

三公若有邦事則為之前驅而辟注鄭司農云鄉士為
三公道也若今時三公出城郡督郵盜賊道也疏
郵謂郵行往來盜賊謂舊為盜賊即不良之人故郡
內督察郵行者是盜賊之人使之道以況古鄉士為
道相類也

訝士有治於士者造焉注如今郡國亦時遣主者吏詣
廷尉議者疏漢時獄官號廷尉

四方有亂獄則往而成之注猶呂步舒使治淮南獄

疏呂步舒明春秋公羊為丞相長史淮南王反武帝
詔使宗正劉德與步舒窮驗其事

朝士外朝之法注雉門設兩觀與今之宮門同 疏舉

漢以況周

今司徒府有天子以下大會殿亦古之外朝哉 疏舉

漢法況義

得獲貨賄人民六畜者注鄭司農云若今時得遺物及
放失六畜持詣鄉亭縣廷大者公之大物没入公家

也小者私之小物自畀也

期外不聽注鄭司農云若今時徒論決滿三月不得乞鞫

有判書注鄭司農云謂若今時辭訟有券書者為治之犯令者注若今時加貴取息坐臧

殺之無罪注鄭司農云若今時無故入人室宅廬舍上人車船牽引人欲犯法者其時格殺之無罪 疏先

鄭舉漢賊律云

晉志魏李悝著法經其律始於盜賊鹽鐵論一尺
四寸之律古今一也或以治或以亂

司民皆書於版注版今戶籍也

司刑注今東西夷或以墨劓為俗古刑人亡逃者之世
類與宮若今宦男女也鄭司農云漢孝文帝十三年
除肉刑 疏宦男女即宮人婦女及奄人使守內閤
者也文帝赦肉刑所赦者唯赦墨劓與刖三者其宮
刑至隋乃赦也

書呂刑正義漢除肉刑除墨劓刖耳官刑猶在隋
開皇之初始除男子宮刑婦人猶閉於宮

詔刑罰法處其所應不如今律家所署法矣

司刺三宥注鄭司農云過失若今律過失殺人不坐死
玄謂識審也不審若今仇讐當殺甲見乙誠以為甲
而殺之者過失若舉刃欲斫伐而軼中人者遺忘若
間帷薄忘有在焉者而以兵矢投射之 疏甲乙者
興喻之之義

三赦注鄭司農云幼弱老旄若今時律今年未滿八歲八十以上非手殺人他皆不坐

司約丹圖注丹圖未聞或有雕器簞簞之屬有圖象者與今俗語有鐵券丹書豈此舊典之遺言與

職金楬而璽之注鄭司農云今時之書有所表識謂之楬檠 疏楬即今之板

金罰疏夏侯陽說云墨罰疑赦其罰百率古以六兩為率古尚書說百鍤鍤者率也一率十一銖二十五

分銖之十三也百鍰為三斤鄭玄以為古之率多作
鍰

蕭望之傳張敞曰甫刑之罰小過赦薄罪贖有金
選之品注選音刷字本作銖銖即鍰也其重十一
銖二十五銖之十三一曰重六兩

用金石注作槍雷

音椎 誅

宅耕反

之屬

䟽皆謂守城禦

捍之具

司屬掌任器貨賄入于司兵注鄭司農云若今時傷殺

人所用兵器盜賊臧加責沒入縣官 疏加責者即

今時倍臧

其奴注鄭司農云今之為奴婢古之罪人也玄謂奴從坐而沒入縣官者 疏漢時名官為縣官非謂州縣也

史記索隱云夏家王畿內名縣內即國都也王者官天下故曰縣官

司園任之以事注鄭司農云若今時罰作矣

史記馮唐傳雲中守魏尚削其爵罰作之

掌戮注斬以鈇鉞若今要斬也殺以刀刃若今棄市也
宮者使守內注以其人道絕也今世或然

野廬氏比修除道路者注比較治道者名若今次金敘
丈功 疏謂漢時主役之官官名次金敘主以丈尺

賦功

凡道禁注禁謂若今絕蒙大巾持兵杖之屬 疏古時
禁書亡故舉漢法而言也

蜡氏置榻焉注鄭司農云今時榻檠是也有地之官有部界之吏今時鄉亭是也

司寤氏掌夜時注夜時謂夜晚早若今甲乙至戌疏

甲乙則早時戌亥則晚時也

疏以戌為戌誤甲乙至戌謂夜有五更

西域傳杜欽曰斥候士五分夜擊刁斗自守一夜

有五更故分而持之天文志有甲夜乙夜袁宏漢

舊儀晝漏盡夜漏起省中用火中黃門關五夜甲

夜乙夜丙夜丁夜戊夜相傳授守火關內戶外鼓

五止宮中衛官城門擊刁斗傳五夜百官各徼直
符行衛士周廬擊木柝唯呼備

夜士注主行夜徼候者如今都候之屬 疏行夜來往
周旋謂徼候者

司烜氏以鑿取明水於月注鑿鏡屬取水者世謂之方
諸 疏漢世謂之方諸

明竈注若今揭頭明書其罪法也

條狼氏執鞭以趨辟注趨而辟行人若今卒辟車之為

庶氏毒蠱注賊律曰敢蠱人及教令者棄市

雜氏春始生而萌之夏日至而夷之秋繩而芟之注萌
之者以茲其斫其生者夷之以鉤鎌迫地芟之也若
今取菱矣 疏漢時茲其即今之鋤也

蠹氏注齊魯之間謂蠹為蠹

伊耆氏齒杖注鄭司農云今時亦命之為工杖

大行人諭書名注書名書之字也古曰名聘禮曰書名

以上

小行人秋獻功注若今計文書斷於九月其舊法
管節注如今之竹使符也

賻補注鄭司農云若今時一室二尸則官與之棺也

司儀旅擯注旅讀為鴻臚之臚

行夫傳遽注傳遽若今時乘傳騎驛而使者也

掌訝次于舍門外注次如今官府門外更衣處 疏舉

漢法以況之即今門外亦然

考工記注胡今匈奴

鮑書或為鞞蒼頡篇有鞞覺 疏藝文志蒼頡有七章
秦丞相李斯所作鞞覺是其一篇內有治皮之事故
引為證也

既建而迪注鄭司農云迪讀為倚移從風之移 疏司
馬長卿上林賦云

戚速注齊人有名疾為戚者

終古注齊人之言終古猶言常也

鞞注鄭司農云鞞讀為旃僕之僕謂伏兔也 疏伏兔

漢時名今人謂之車屐是也

輪人三材注今世穀用雜榆輻以檀牙以檀也 疏鄭
舉今世所用木為此三者

牙也者注鄭司農云謂輪輮也世間或謂之罔

眡其綆注鄭司農云綆讀為關東言餅之餅 疏依俗
讀也

察其菑注鄭司農云菑讀如雜廁之廁泰山平原所樹
立物為菑博立梟碁亦為菑 疏史游章分別部居

不雜廁博戲時立一子於中央謂之梟碁

為之弱注今人謂蒲本在水中者為弱 疏史游章云

蒲弱蘭席謂取蒲之本在水者為席

棊注鄭司農云蜀人言檄曰棊

弓注蓋橈也 疏漢世名蓋弓為橈子也

輶人緇其牛後注鄭司農云關東謂紂為緇

築氏為削注今之書刀 疏古者未有紙筆則以削刻

字至漢雖有紙筆仍有書刀是古之遺法也

漢書刀筆吏注刀所以削書古者用簡牒故吏皆以刀筆自隨

治氏戈廣二寸注戈今句子戟也或謂之鷄鳴或謂之擁頸鋌讀如麥秀鋌之鋌 疏據漢法而言漢時見胡橫之句子戟鷄鳴者以其胡似雞鳴故也擁頸者以其胡曲故謂之擁頸有此數名也

倨句注俗謂之曼胡似此 疏胡外廣而本寬曼胡然案莊公四年左氏傳楚武王荆尸授師于馬以伐隨

注子句子凡戟而無刃秦晉之間謂之子或謂之鏡
吳揚之間謂之伐東齊秦晉之間其大者謂之曼胡
其曲者謂之句子曼胡

重三鎡注許叔重說文解字云鎡鍤也今東萊稱或以
大半兩為鈞十鈞為環環重六兩大半兩鍤鎡似同
矣則三鎡為一斤四兩 疏鎡鍤輕重無文故王肅
之徒皆以六兩為鍤是以鄭引許氏及東萊稱為證
也

戟注今三鋒戟也 疏三鋒者見此經言援言胡又言

刺

桃氏謂之下制注下制長二尺重一斤一兩三分兩之
一此今之匕首也 疏漢時名此小劍為匕首也

鳧氏鍾縣謂之旋注今時旋有蹲熊盤龍辟邪 疏舉
漢法鍾旋之上以銅篆作蹲熊及盤龍辟邪辟邪亦
獸名古法亦當然也

篆間謂之枚注今時鍾乳俠鼓與舞每處有九面三十

六 疏舉漢法一帶有九古法亦當然鍾有兩面面皆三十六也

粟氏量之以為鬴注鬴六斗四升也鬴十則鍾方尺積千寸於今粟米法少二升八十一分升之二十二其數必容鬴此言大方耳 疏算術有算粟為米之法畫績山以章注齊人謂麋為獐

五入為緺注緺今禮俗文作爵言如爵頭色也

慌氏漚其絲注楚人曰漚齊人曰淩

玉人侯用瓚注瓚讀為饗饗之饗

作旦反

疏醢人職有

饗食漢時有膏饗

玉多則重石多則輕 疏盈不足術曰玉方寸重七兩

石方寸重六兩

大圭注終葵椎也相玉書曰珽玉六寸明自炤 疏齊

人謂椎為終葵

裸圭注瓚如盤其柄用圭有流前注

矢人夾而搖之注今人以指夾矢儻衛是也

梓人顧注鄭司農云讀為鬻頭無髮之鬻 疏時俗有以無髮為鬻

觚三升注觚當為解 疏禮器制度云觚大二升解大

三升

廬人句兵禰注齊人謂柯斧柄為禰

匠人四阿重屋注四阿若今四注屋重屋復椽也 疏

燕禮云設洗當東雷則此四阿四雷者也復椽重承

壁材

上林賦高廊四注

大扃小扃注大扃牛鼎之扃長三尺小扃腳鼎之扃長二尺 疏此約漢禮器制度知之

外有九室注九室如今朝堂諸曹治事處 疏據漢法謂正朝之左右為廬舍者也

宮隅城隅注謂角浮思也 疏鄭以浮思解隅者案漢時云東闕浮思災言災則浮思者小樓也明堂位疏屏注亦云今浮思也刻之為雲氣蟲獸如今闕上為

之矣則門屏有屋覆之與城隅及闕皆有浮思刻畫
為雲氣并蟲獸

文帝紀未央宮東闕罽毼災顏師古注罽謂連
闕曲閣也以覆重刻垣墉之處其形罽毼然一曰
屏也王莽傳遣使壞渭陵延陵園門罽毼曰毋使
民復思也

耜廣五寸注古者耜一金兩人併發之今之耜歧頭兩
金象古之耦也 疏後漢用牛耕種故有歧頭兩脚

耜今猶然也但以牛種用一耜則畎下布種與古異矣

堂涂注謂階前若今令甃也 疏漢時名堂涂為令

甃 甃令甃則今之塼也 甃則塼道也

令音零甃薄 歷反甃音階

車人一橋有半謂之柯 注鄭司農云蒼頡篇有柯橋車人為耒疏古法耒下惟一金不歧頭先鄭云耒下歧據漢法而言其實古者耒不歧頭是以後鄭上注亦云今之耜歧頭

以其一為之首注首六寸謂今剛闕頭斧 疏漢時斧
近刃皆以剛鐵為之又以柄闕孔即今亦然故舉漢
法為說也

羊車注羊善也善車若今定張車 疏雖舉當時漢法
以曉人漢世去今久遠亦未知定張車將何所用但
知在宮內所用故差小為之謂之羊車也

弓人芟解注芟讀如齊人名手足擊為骹之骹

故剽注鄭司農云剽讀為湖漂絮之漂 疏時有此語

從俗讀之

檝脂膏臚敗之臚

疏若今人頭髮有脂膏者則謂之

臚

漢制攷卷二